



रवीन्द्र कुमार

रवीन्द्र कुमार के जनम नालंदा जिला के बिहार शरीफ में 6 जनवरी 1936 के भेल हल। रवीन्द्र कुमार पर मगही भासा के नाज हे। इनकर कहानी में मगही भासा के सब्द-सौंदर्य, निखर उठऽ हे। ग्रामीण जिनगी के लालित्व अपन पूरा संवेदना के साथ उनकर कहानी में मौजूद हे। कई दर्जन कहानी के रचनाकार रवीन्द्र कुमार के कहानी रचना आउ सिल्प के स्तर पर कउनो भासा के कहानी के समानान्तर खड़ा हो सकऽ हे। इनकर परकासित कहानी संकलन के नाम हे 'अजब रंग बोले'।

'पितर के फुचकारी' में बाल सुलभ प्रवृत्ति के जबरदस्त फलक मिलऽ हे। पिता के पुत्र के प्रति मोह-ममता उमड़ पड़ऽ हे। लइकन के फुसलावे ला दादी कहानी सुनावऽ हे। आर्थिक तंगी यानि कि पइसा के कमी से पिता के क्रोध पैदा होवऽ हे, जेकरा कारन ऊ पुत्र के पीट देहे। ओकरा पितर के फुचकारी खरीदे के छमता न हे। बाद में ऊ पुत्र के देख के रो पड़ऽ हे। ओकरा प्यार करे लगऽ हे। ई देख के नायक के माय के ममता भी उमड़ पड़ऽ हे।

पितर के फुचकारी

'नयँ, हम लेम तो ओइसने लेम !'

'ओइसन लेके तूँ की करबहीं रे; आँय ? तोरा ओकरो से नीमन ला देबउ। ओइसन पोवार नीअर पीअर फुचकारी की लेमँ ? तोरा हम चानी नीअर चम-चम ला देबउ। हहरऽ हें काहेला ?'

'नयँ, हम लेम तो छोटुए अइसन लेम !'

'अच्छे, चुप रह ! ला देबउ।'

ऊ बुतरुआ फिन्तू लाहरी करे लगल। रामधनी के मिजाज गरम हो गेल — 'अरे ससुर, कहलिअउ तो, ला देबउ। एते जिद्दी काहे हो जाहें।'

बुतरू के जात, फिड़की सुनके चुप हो गेल। रामधनी कंधा पर अंगोछा रखलक आउ फाँड़ा में दूगो रुपइया लेके चलल बजार। बजार पहुँचला पर एक ठमा देखलक कि ढेर सा पित्त के फुचकारी लटक रहल हे—ठीक बुद्धन के बेटवा छोटुए जइसन। रामधनी मन में सोचलक—‘होलिओ रोज-रोज आवऽ हे ! छौड़ा के मन आज रख लेल जाय। बस ऊ दोकान पर बढ़ के दोकनदार से ओकर दाम-साम करे लगल—‘एकर केतना दाम हो ?’

‘सवा तीन रुपइया।’

‘बाप रे, एतनिँ गोके सवा तीन रुपइया लेबहूँ ?’

‘अरे खरीदे के मन नयँ रहो तो दाम मत पूछल करऽ।’

दोकनदार के घुड़की सुनके रामधनी सकदम में पड़ गेल। कइसहुँ फिनुँ बोलल—‘अच्छे भाई, ने हमर बात ने तोहर। पउने दू रुपइया में दे देहूँ।’

‘एजा मोल-जोल नयँ कइल जाहे। कोई दोसर दोकान देखऽ !’

‘भाई जी, एकरा में दोसर दोकान के कउन बात हे ! दू रुपइया तलक हममें दे दे सकऽ हिओ।’

‘कहबे करऽ हऽ, तो तीन रुपइया से कम नयँ लगतो। लेवे के हो तो लऽ; नयँ तो... ?’

‘तीने रुपइया काहे; हम तो तोरा सवा-तीनो गो दे देतिओ हल, बाकि अखनी हमरा हीं बेसी नयँ हे। नयँ तो एत्ते धिधिअइतियो नयँ हल। एहू दू रुपइया हम बुतरू के मन रक्खे ला दे रहलिओ हे।’

‘एतना में नयँ होतो।’

लचार होके रामधनी आगे बढ़ल। सोँचे लगल, टीने के काहे ने ले लेउँ ? चार-पाँचे आना में काम चल जायत ! अरे बुतरू जात के हिरिस हइ आउ का ! अप्पन रहते ऊ तुरते भुला जायत। पित्त के फुचकारी ओकर खियालो से उतर जायत। फिन परबो लागी तो सर-सरजाम लेवे के हे। दुइए रुपइया में सभे करे के हे।

सब गम-बुझ के रामधनी सौदा कैलक आउ घरे लउट गेल। बजार से अइते देख के धनुआँ हुलसते बाप भिर गेल। रामधनी अप्पन हाथ के फुचकारी ओकर हाथ में थम्हाँ देलक। धनुआँ जे टीन के फुचकारी देखलक, से जर के खाक हो

गेल। फुचकारी के कस के अँगना में फेंक देलक। संजोग के बात, फुचकरिया फेंका के अँगना के इनरवा में चल गेल। अब रामधनी के गोस्सा के कोय ठेकाना नयँ रहल। दे थपड़, दे थपड़, धनुआँ के अन्हुआ देलक। धनुआँ भोंकार पार के काने लगल। ओन्ने धनुआँ के मामाँ ओकरा जे कानते सुनलक से हाँहे-फाँहे धउगल आयल। रामधनी से छीन के धनुआँ के करेजा से साट लेलक आउ गुदाल कर-कर के लगल रामधनी के गरियावे—‘हाय रे हाय ! बचवा के मारिए देलक। अरे दूअर-टापर बचवा पर हाथ उठयते गल नयँ गेलउ रे !’

धनुआँ के मामाँ अपने बेटवा के गरिया रहल हल। महल्ला-टोला के दू-चार अदमी मजा लेवे ला जमा हो गेल। धनुआँ के मामाँ कस-कस के गरिअइले हल। ऊ तखनी तक गरिअइते रहल जखनी तक ओकर मुँह नयँ पिरा गेल। रामधनी खिसिआयल-ठिसुआयल ओज्जा पर से टर गेलक।

होली के धूम मचल हल। रंग-अबीर से सबके हाल देखहीं लायक हल। ढोल-मँजीरा पर फाग के धूरी उड़ रहल हल। सगरो मस्तीए-मस्ती छायाल हल।

गोस्सा के मारे धनुआँ के मामाँ परब में कुच्छो नयँ पकौलक। पोतवा लागी खाली चार पइसा के बुनिया आउ दू पइसा के तेलही जिलेबी ले आयल। धनुआँ मुँह फुलयले हल, से बड़ी खोसामद करे से तनि-मनि खयलक-पीलक।

रस्से-रस्से साँफ हो गेल, फिन रात। दादी-पोता ओसरे में खटिया पर पड़ गेल, मामाँ खिस्सा सुनावे लगल—

‘एगो रानी हल। रानी के एगो बेटा हल

धनुआँ धिआन लगा के खिस्सा सुने लगल।

‘...एतने कहानी

बोदा रानी

बोद-बुदकड़

चुल्हा ऊपर लकड़

चुल्हा पर चकटी

धनुआँ के सास नकटी...

धनुआँ अप्पन सास के नकटी-सुनके लजा गेल। ऊ मामाँ के अप्पन छोट-छोट हाथ से मारे लगल। मामाँ हँसते-हँसते बोलल—‘अच्छा भाय, धनुआँ के सास नयँ, रानी के सास नकटी।’

तब कहीं धनुआँ अप्पन हाथ रोकलक—‘फिन रानी की कहलकइ मामाँ?’

‘रात केत्ते भींग गेलउ बेटा, अब सरदार निअर चुपे-चाप सुत रह। खिस्सा खतम, पइसा हजम।’

‘नयँ-नयँ, जो!’

‘तू तो भुका के रख देहे’ रे! अच्छा सुन.....’ खिस्सा चलते रहल। दादी-पोता खिस्सा कहते-सुनते कखनी सुत गेलन, एकर खबर केकरो न होयल।

ओने रामधनी पुरवारी ओसरा में खटिया पर पटायल हल। आज की जाने काहे ओकरा धनुआँ के माय के इयाद आ रहल हल। धनुआँ के माय साँप के काटे से मर गेल हल। मरे बखत ऊ चेतउले गेल हल—‘देखिहऽ जी, छौंड़ा पर धिआन रखिहऽ। अइसन ने टूअर-टापर बुतरू निअर हम्मर पीछू में एहू बिलट-बिलट के मर जाय।’

रामधनी के आउ नयँ रहल गेल। गते-गते चोर निअर ऊ अप्पन माय के खटिया भिर गेल। धनुआँ सुतल हल। गाल पर बहल लोर के सुक्खल धार ईजोरिया में भक-भक लउक रहल हल। रामधनी धनुआँ पर भुक गेल। ओकर परेम में दिवाना निअर करे लगल। ऊ कभी धनुआँ के गाल चूमे कभी लिलार। रामधनी के माय अदमी के गंध पइलक, से भट खटिया पर से उठ गेल। रामधनी के पेआर करते देखलक तो सल्ले-बल्ले पाया भिर चल गेल। ओकरो आँख से लोर बह-बह के गिरे लगल।

तुरते खियाल पड़ल—‘हाय रे हाय! हम्मर बेटवा आज परबो में एगो खुदियो मुँह में न डाललक। होली जइसन परब फिन कहिआ आयत!’ अधरतिये में गोइंठा जोड़ के ऊ पकावे चलल।

धनुआँ कुलबुला के उठ गेल। बाप के जे एत्ते दुलारते देखलक, से फूट के काने लगल। रामधनीओं से नयँ रहल गेल। बुतरूओ से बत्तर ऊ काने लगल। आँख से बरखा के नदी निअर धार बहे लगल।

ओने असमान में चाँद सब्भे-कुछ देख रहल हल। दुनिया भर के फुचकारी के रंग के चाहे ऊ पितर के होय चाहे टीन के, ऊ केकरो से नयँ रंगावल हल। केकरो

हँसी-खुसी के परभाव ओकरा पर नयँ पड़ल हल। बाकि ई देख के ओकरो आँख छलक आयल। ओकर लोर से टाँड़-टिल्हा, घर-दुआर सभे ओढ़ा हो गेल।

अभ्यास-प्रश्न

मौखिक :

1. (क) कहानी के तीन मुख्य तत्व बतावऽ।
- (ख) धनुआ मामा के अप्पन छोट-छोट हाथ से काहे मारे लगल ?
- (ग) 'ओने असमान में चाँद सब्भे-कुछ देख रहल हल'—ई वाक्य मे कउन भाव के दरसावल गेल हे ?
- (घ) कहानी में कउन पात्र तोर मन मोह लेवऽ हे आउ काहे ?
- (ङ) 'होलियो रोज-रोज आवऽ हे ?' एकरा से कउन भाव निकलऽ हे, समझावऽ।

लिखित :

1. रवीन्द्र कुमार के पाँच पंक्ति में परिचय दऽ।
2. कहानी सिलप के मोताबिक 'पितर के फुचकारी' कहानी के कसउटी पर कसऽ।
3. ई कहानी के माध्यम से का सनेस मिलऽ हे ? पाँच वाक्य में बतावऽ ?
4. दोकनदार आउ रामधनी के बतकही पाँच वाक्य में लिखऽ।
5. रामधनी के चरित्र के पाँच गो विसेसता बतावऽ।
6. रामधनी के आँख से लोर काहे बहे लगल ?
7. धनुआँ फूट के काहे काने लगल ?
8. रामधनी ला होली कइसन रहल ? एकरा से तोरा पर का असर पड़ऽ हे ?
9. 'पितर के फुचकारी' एकर सीर्सक काहे रखल गेल हे ?
10. नीचे लिखल वाक्य के व्याख्या करऽ :

हाय रे हाय ! हमर बेटवा आज परबो में एगो खुदियो मुँह में न डाललक।
होली जइसन परब फिन कहिआ आयत !

भासा-अध्ययन :

1. पाठ से पाँच गो मुहावरा चुनके ओकर अर्थ बतावऽ ।
2. पाठ से पाँच गो समासिक सब्द चुनके बतावऽ ।
3. पाठ से चार गो सहचर सब्द चुनके बतावऽ ।



योग्यता-विस्तार :

1. कोई अइसने कहानी विद्यालय के पुस्तकालय से चुन लावऽ आउ किलास में सुनावऽ ?
2. ई कहानी में गरीबी आउ ममता के बीच जे संबंध बतावल गेल हे, ऊ तोरा विचार से केतना मेल खाहे ?

संब्दार्थ :

निमन	—	अच्छा
बुतरू	—	लड़का
धिधियाना	—	गिड़गिड़ाना
भकभक	—	साफ-साफ
अखनी	—	अब

